

جریدہ علیہ

مشیتِ جلیلہ اسلامیکہ جریده رسمیه میر

غره رمضان المبارک سنہ ۱۳۳۸

پنجنی سنہ

اون بش کونده بر نشر اولنور

عدد ۶۰

دین نصیحتدر

— نویدن —

دین ، صحیح مسلمده تمیم داریدن نقل اولئان حدیث شریفده بیان اولندوغی اوزره
اللهه ، کتابنه ، رسولنه ، ائمه مسلمینه وبالعموم مسلمانلره نصیحتدن عبارتدر . بویک
بیوک شرفلی برحدیثدر . اسلامک مداری شمدی ذکرایدیلهجکی کی بونک اوزرینهدر .
نصیحت جمعیلی برکلهدر . نصیحت اولئانه قارشو مودتده خلوص ، افیکار و نیاتده غل
وغشدن آزادهک ، و فهروجهله اونک حقنی محفوظ بولندرمق دیمکدر . حدیث شریفدن
مقصد دینک مستندی ، مابهالقوامی نصیحتدر ، دیمکدر .

نصیحت وانواعک ایضاحنهکنجه ، اللهه نصیحتک معناسی شوشیلره راجعدر : جناب
حقه ایمان ایتک ، اوندن شریکی نفی ایتک ، صفاتنده الحادی ترک ایتک ، اونی بتون کال
وجلال صفتلریله توصیف ایتک ، جمیع نقائصدن تنزیه ایتک ، طاعتنی رینه کتیرمک ،
معصیتندن اجتناب ایتک ، اونک اوغورنده محبت ، اونک اوغورنده بغض ایتک ، اوکا
اطاعت ایدنله دوست اولمق ، عصیان ایدنله دشمن اولمق ، جهاد ایتک ، نعمتنی اعتراف
ایدوب شکر ایتک ، کافه امورده اخلاص وتعداد اولئان اوصافک هپسنه دعوت وتشویق
ایتک ، بتون انسانلر ویا ممکن اولان کسهلر ایچنده بوخصوصلر حقنده رفقایله حرکت ایتک
نصیحتک جناب حقه شونسبتک حقیقی ایسه عبدک کندی نفسنه خیرخواهلیغنه راجعدر ،
زیرا جناب حق هرکسک نصیحتندن مستغنیدر .

کتاب اللهه نصیحت ، اونک کلام و تنزیل الهی اولدیغنه ، خلقک کلامندن یر شیک
اوکابکیزه مدیکنه ، اونک نظیرینه کیمسه نک قادر اولدیغنه اینانوب اوکاتعظیم ایتک ، لایق
اولدوغی وجهله تلاوت ایتک ، وتلاوتی حسن صورتله اجرا ایتک ، تلاوت زماننده خشوع
کوسترمک ، تلاوتده حرفلرک حقنی ویرمک ، اوندن ارباب تحریفک تأویلی ، معترضلرک
تعرضنی دفع ایتک ، محتویاتی تصدیق ایتک ، احکامندن ایرلامق ، علوم وامثالی آکلامغه
چالشمق ، موعظه لرندن عبرت آلمق ، عجائبنده فکره طالمق ، محکمیه عمل ایتک ،
متشابهنی تسلیم ایتک ، عموم وخصوصندن ، ناسخ ومنسوخندن بحث ایتک ، علومنی نشر
ایتک ، اوکا واونک حقنده نصیحتنه دعوت ایتکدر .

رسول الله صلى الله تعالى عليه وسلم حضرت تيرينه نصيحت ، رسالتى تصديق ايتك ،
 كيتريديكنك هپسینه ايمان ايتك امر ونهينه اطاعت ، حیات و ممانده كندينه يارديم ايتك ،
 دشمنه دشمن ، دوستنه دوست اولمق ، حقنده تعظيم وتوقير ايتك ، مسلك وسنتى احيا
 ايتك ، دعوتى اشاعه ايتك ، شريعتى نشر واوندن اتهاماتى نفى ايتك ، علوم شريعتدن
 استفاده ايدوب معانيسنى آكلامغه اوغراشمق ، شريعتده دعوت ايتك ، تعليم وتعلمنده رفق ايله حرکت
 ايتك ، اوکا تعظيم وتجليل ايتك ، اوقونديغى زمان ادب اوزره بولمق ، بيلمه دن حقنده
 سوز سويلمكدن احتراز ايتك ، اهل شريعته اوکا اتسابلرندن طولاني احترام ايتك ، اخلاق
 سنيه لريله تخلاق ايتك ، آداب نبويه لريله ادبلنمك ، اهل بيته واصحاب كرامنه محبت ايتك ،
 سنت نبويه لريله بدعتنه سالك اولاندن ياخود اصحابندن برينه تعرض ايدندن اجتناب ايتك
 وبوكا مماثل شيلردر .

ائمه مسلمينه نصيحت ، حق خصوصنده اونلره معاونت واطاعت ايتك ، حق ايله
 اونلره امر ايتك ، رفق وملايمتله اونلرى ايقات واونلره اخطار ايتك ، حقوق مسلميندن
 اولوب كنديلرينك غفلت ايتدكلى و كنديلرينه واصل اولمىانى اونلره بيلديرمك ،
 اونلردن جور ياخود ايني كچنمه مك ظهور ايتديكى وقت اوزر لرينه قليجه خروجى ترك
 ايتك ، نساى كاذبله اونلرى آلداتمه مق ، اونلره صلاح ايله دعا اولتمقد . بونك هپسى
 ائمه مسلميندن مقصد خلفا وسائر مسلمانلرك ايشلرينه باقان اصحاب ولايات اولدوغنه
 كوره در . مشهور اولان ده بودر . بونك علمى دیندن عبارت اولان ائمه ايله تاویل
 اولوندوغى ده واردر . اونلرك روايت ايتدكلى قبول ايتك ، احكامده كنديلرينه اتباع
 ايتك واونلره حسن ظن ايتك ده اونلره نصيحت عدادندندر .

بالعموم مسلمانلره - كه ولاه امور دن ماعداسيدر - نصيحت ده ، اونلرى دنيا
 و آخرتده كى منفعتلرينه ارشاد ايتك ، اونلردن اذا وجفائى منع ايتك (شو حلاله امور
 ديندن بيلمكلى اونلره اوكره تير ، دين خصوصنده قولاً وفعلاً اونلره معاونت ايدر) ،
 معايليرنى ستر ، احتياجليرنى سد ايتك ، اونلردن مضراتى دفع واونلره منافعى جلب
 ايتك ، رفق وخلصله اونلره امر بالمعروف ، نهى عن المنكر ايتك ، شفقت ايتك ،
 بيوكلىنه حرمت ، كوچكلىنه مرحمت ايتك ، آره صيره موعظه حسنه ايله اونلره تقيد

ایتمک ، اونلره خلوص سزلق و حسدی براقق ، اونلر ایچون کندینه ایستدیکی اییلکی ایسته مک ، خوشنه کیتمین قنالی ایسته مک ، ماللرینی ، عزلرینی و سائر حاللرینی قولاً و فعلاً مدافعه ایتمک ، ذکر ایتمکمز انواع نصیحتک هپسیله تخلقه اونلری تشویق ایتمک ، طاعاته همتلرینی تشیط ایتمکدر .

سلف صالحین حضراتی ایچنده نصیحت کندیسینی — دنیاسنی ضرره اوغراتمغه سوق ایدنلر بولنوردی . طبرانی اسنادیله روایت ایدیورکه جریر رضی الله عنه کوله سنه کندیسینی ایچون برآت آلمسینی امر ایتمدی ، کوله اوکا اوچیوز درهمه برآت آلوب پاره سنی ویرمک ایچون صاحیله برلکده کتیردی . بونک اوزرینه آره لرنده شویله بر محاوره جریان ایتمدی :

جریر — سنک آتک اوچیوز درهمدن دها ایدر ، درتیوزه ساتارمیسک ؟
آتک صاحبی — یا ابا عبدالله ، اولور .

جریر — سنک آتک بوندن دها ایدر ، بشیوز درهمه ساتارمیسک ؟
صوکره تمادیا یوزر یوزر آرتیریور و آت صاحبی راضی اولیور ، جریرده ، سنک آتک دها ایدر ، دیوردی ، تا که سکز یوز درهمه قدر چیقدی و او قدره آلدی . بو خصوصده کندیلرینه سوز سویلننجه ، بن رسول الله صلی الله تعالی علیه وسلم افندمز هر مسلمان حقنده مخالفت ایتمک اوزره مبیاعه ایتم ؟ دیدیلر .

اعضادن

شوکتی

